


Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije
Mostar



Program
utroška sredstava utvrđenih u razdjelu 17. Budžeta Federacije Bosne i
Hercegovine za 2018. godinu Federalnom ministarstvu energije, rudarstva i
industrije „Tekući transferi i drugi tekući rashodi - Subvencije privatnim
preduzećima i poduzetnicima“



Mostar, februar 2018. godine

1. UVOD

Na nivou cijele Bosne i Hercegovine desetine hiljada radnika ima probleme sa neuvezanim radnim stažem, zbog čega mnogi ne mogu pomišljati da odu u penziju. Pored radnika, oštećena je i država, odnosno fondovi za milione maraka. Veliki je broj radnika koji imaju probleme sa uvezivanjem radnog staža i ispunjavanjem drugih ostvarenih prava. Brojni njihovi slučajevi su na sudu ili na reviziji. Neuplaćivanje doprinosa stvara velike probleme radnicima, a najveći su zdravstveno osiguranje i odlazak u penziju. Ljudi koji su ispunili uslove za penziju, ne mogu je ostvariti zbog neuvezanog radnog staža, i oni čine jednu od najosjetljivijih kategorija društva. Iako je gotovo nemoguće utvrditi tačan broj neuvezanih godina radnog staža, jedno je sigurno, da ovom dinamikom to pitanje neće biti riješeno u dogledno vrijeme. Ono što predstavlja veliki problem je i činjenica da i danas veliki broj poslodavaca ne plaća doprinose.

Zbog prethodno navedenog, dolazi do narušavanja socijalne i fiskalne stabilnosti zemlje. Budući da se radi o iznimno značajnom socijalnom pitanju, ukazala se potreba za uvođenjem mjera za poboljšanje stepena naplate navedenih obaveza. U vezi sa naprijed navedenim, u Budžetu Federacije Bosne i Hercegovine za 2018. godinu, u razdjelu 17, ekonomski kod 614 - Tekući transferi i drugi tekući rashodi, na poziciji „Subvencije privatnim preduzećima i poduzetnicima“ osigurana su sredstva u iznosu od 1.000.000,00 KM za uvezivanje neuplaćenog staža.

2. PRAVNI OSNOV

- Projekat: Razvoj industrijske politike u Federaciji Bosne i Hercegovine, („Službene novine Federacije BiH“, broj 40/10)
- Akcioni plan za realizaciju projekta „Razvoj industrijske politike u Federaciji BiH“ 2016-2019 (Zaključak V. broj 91/2016 od 14.01.2016. godine)
- Strategija razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine ("Službene novine Federacije BiH ", broj 65/13)
- Izmjene i dopune Akcionog plana 2013-2018. godine za realizaciju Strategije razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine (Zaključak V. broj 1823/2016 od 29.09.2016. godine)

3. ZAKONODAVNI OKVIR PROVOĐENJA PROGRAMA

- Budžet Federacije Bosne i Hercegovine za 2018. godinu („Službene novine Federacije Bosne i Hercegovine“, broj 5/18);
- Zakon o izvršavanju Budžeta Federacije Bosne i Hercegovine za 2018. godinu („Službene novine Federacije Bosne i Hercegovine“, broj 5/18);

4. CILJ PROGRAMA

Program utroška sredstava utvrđenih u razdjelu 17. Budžeta Federacije Bosne i Hercegovine za 2018. godinu Federalnom ministarstvu energije, rudarstva i industrije „Tekući transferi i drugi tekući rashodi - Subvencije privatnim preduzećima i poduzetnicima, (u daljem tekstu: Program) odnosi se na finansiranje neizmirenih obaveza preduzeća samo po osnovu doprinosa za PIO/MIO zaposlenicima koji

ostvaruju uslove za penzionisanje do dana podnošenja zahtjeva Federalnom ministarstvu energije, rudarstva i industrije, po ovom Programu, za dodjelu sredstava.

Dodjeljena sredstva su grant sredstva i dodjeljuju se za izmirenje dugovanja preduzeća za neuplaćene doprinose samo po osnovu obaveza za PIO/MIO.

5. NAMJENA DODIJELJENIH SREDSTAVA

Dio sredstava dodijeljenih Federalnom ministarstvu energije, rudarstva i industrije (u daljem tekstu: Ministarstvo) u Budžetu Federacije Bosne i Hercegovine za 2018. godinu u razdjelu 17, ekonomski kod 614 dodjeliti će se privatnim preduzećima, odnosno pravnim licima koja su u sudski registar upisana kao privredno društvo u kojem privatna lica imaju udio u vlasništvu u iznosu, najmanje, 50% plus jedna dionica.

Sredstva se dodjeljuju preduzećima čija je osnovna djelatnost vezana za sljedeće sektore industrijske proizvodnje:

- Metalna, elektro i automobilska industrija,
- Industrija građevinskog materijala,
- Drvena, papirna i grafička industrija,
- Proizvodnja tekstila, kože i obuće,
- Hemijska industrija i industrija gume i plastike.

6. KRITERIJI ZA IZBOR KORISNIKA SREDSTAVA ZA DODJELU

Korisnici sredstava po ovom Programu su sva preduzeća, kao i preduzeća u poteškoćama ili u stečaju sa sjedištem u Federaciji Bosne i Hercegovine čija je primarna djelatnost definisana djelatnostima proizvodnje u sektorima navedenim u tački 5. ovoga Programa, te da zapošljavaju najmanje 15 zaposlenika.

Kriteriji za izbor korisnika sredstava će se definisati u Javnom pozivu i u posebnim aktima koja po potrebi donosi Komisija za izbor korisnika.

Pri izboru korisnika će se poštivati osnovni principi kao što su jednako postupanje prema svim podnosiocima zahtjeva za dodjelu sredstava, povjerljivost i transparentnost. Posvetiće se posebna pažnja ravnomjernoj zastupljenosti korisnika s cijelog područja Federacije Bosne i Hercegovine.

Prilikom formiranja liste sa imenima zaposlenika iz istog preduzeća, a koji ostvaruju pravo po ovom Programu, prednost će imati zaposlenik sa ranijim datumom sticanja prava na penziju.

7. SREDSTVA PREDVIĐENA ZA DODJELU

Sredstva za provođenje ovog Programa utvrđena su u razdjelu 17, ekonomski kod 614 Budžeta Federacije Bosne i Hercegovine za 2018. godinu.

Navedena sredstva su grant sredstva Federalnog ministarstva energije rudarstva i industrije i dodjeljivati će se po raspisanom Javnom pozivu. Ukoliko sredstva ne budu utrošena u cijelosti, Federalno ministarstvo energije, rudarstva i industrije će raspisati ponovo Javni poziv.

Budžetom Federacije Bosne i Hercegovine u 2018. godini, Ministarstvu, u razdjelu 17, „Tekući transferi i drugi tekući rashodi - Subvencije privatnim preduzećima i

poduzetnicima“ obezbijeđeno je ukupno sredstava u iznosu od 1.000.000,00 KM i predviđeno je da se ista rasporede ovim Programom.

Privatna preduzeća po ovome Programu mogu ostvariti pravo na dodjelu sredstava samo po jednom podnesenom zahtjevu.

Maksimalan iznos sredstava koji može biti dodijeljen jednom privrednom društvu je 150.000,00 KM.

Dodjela sredstava po ovom Programu biti će regulisana ugovorom o dodjeli grant sredstava.

8. TRAJANJE PROGRAMA

Program traje do utroška sredstava, a najkasnije do kraja fiskalne godine.

9. TIJELA NADLEŽNA ZA PROVOĐENJE PROGRAMA

Tijela nadležna za provođenje i nadzor nad namjenskim korištenjem sredstava po ovom Programu su Ministarstvo i Federalno ministarstvo finansija/financija, svako u okviru svoje nadležnosti.

U svrhu kontrole namjenskog korištenja dodjeljenih sredstava korisnik je dužan dostaviti Ministarstvu uvjerenje/potvrdu od Porezne uprave Federacije Bosne i Hercegovine kojom se dokazuje da su za osobe navedene u uvjerenju/potvrdi izmirene sve obaveze radi odlaska u penziju. Uvjerenje/potvrdu treba dostaviti najkasnije 3 mjeseca od dana uplate sredstava.

U slučaju da se sredstva ne opravdaju, preduzeće kojem su ista dodijeljena, obavezno je vratiti sredstva na Jedinствен račun Trezora Federacije Bosne i Hercegovine.

10. PROVOĐENJE PROGRAMA

Sredstva se dodjeljuju na osnovu raspisanog Javnog poziva. Javnim pozivom se definiše potrebna dokumentacija koja se prilaže uz zahtjev za dodjelu sredstava. Javnim pozivom, od potencijalnih korisnika sredstava, će biti zatražena sljedeća dokumentacija:

- Zahtjev za dodjelu grant sredstava,
- Spisak zaposlenika koji su ostvarili uslove za odlazak u penziju isključivo usaglašen sa podacima iz nadležne Porezne uprave, sa datumom sticanja tog prava (najkasnije do dana podnošenja zahtjeva) i iznosom duga po osnovu doprinosa za PIO/MIO, ovjeren i potpisan od strane nadležnog lica preduzeća i nadležne Porezne uprave,
- Aktuelni izvod iz u sudskog registra (ne stariji od 30 dana),
- Statut ili odluka o osnivanju,
- Uvjerenje o poreznoj registraciji kod Porezne uprave – ID broj,
- Uvjerenje o registraciji obveznika poreza na dodanu vrijednost – PDV broj,
- Obavjest nadležnog zavoda za statistiku o razvrstavanju prema djelatnosti,
- Lične karte i CIPS potvrde o prebivalištu lica ovlaštenih za zastupanje,

- Izjavu sačinjenu, ovjerenu i potpisanu od strane odgovornog lica preduzeća, kojom se preduzeće obavezuje da će po donošenju odluke od strane Vlade Federacije Bosne i Hercegovine o dodjeli sredstava, izvršiti uplatu ostalih zaostalih doprinosa (doprinosi po osnovu zdravstvenog osiguranja i doprinosi po osnovu osiguranja od nezaposlenosti) i to za zaposlenike za koje se traže grant sredstva,
- Spisak zaposlenika iz matične evidencije aktivnih osiguranika, izdat od strane nadležne službe ne stariji od 30 dana od dana podnošenja zahtjeva (min. 15 zaposlenika).

Napomena: Zahtjev za dodjelu grant sredstava može se preuzeti na web stranici Ministarstva (www.fmeri.gov.ba).

Svi traženi dokumenti trebaju biti originali ili ovjerene kopije ne starije od 30 dana od dana podnošenja zahtjeva za dodjelu grant sredstava.

Pismeni zahtjev za dodjelu sredstava sa potrebnom dokumentacijom po Javnom pozivu, uvezan i poredan po tačkama Javnog poziva, podnosi se Ministarstvu na memorandumu društva, potpisan od strane ovlaštenog lica, sa naznakom iz kojeg se industrijskog sektora traže sredstva (Metalna, elektro i automobilska industrija; Industrija građevinskog materijala; Drvna i papirna industrija; Proizvodnja tekstila, kože i obuće; Hemijska industrija i industrija gume i plastike).

U cilju provođenja postupka dodjele sredstava na osnovu podnesenih zahtjeva, federalni ministar energije, rudarstva i industrije, Rješenjem imenuje Komisiju za utvrđivanje prijedloga sa rang listom korisnika dijela sredstava utvrđenih u razdjelu 17. Budžeta Federacije Bosne i Hercegovine za 2018. godinu Federalnom ministarstvu energije, rudarstva i industrije „Tekući transferi i drugi tekući rashodi - Subvencije privatnim preduzećima i poduzetnicima“ (u daljem tekstu:Komisija), koje se sastoji od tri člana iz reda zaposlenika Ministarstva.

Radu Komisije, na prijedlog članova Komisije, mogu prisustvovati i predstavnici Udruženja poslodavaca Federacije Bosne i Hercegovine i Sindikata Bosne i Hercegovine, ukoliko članovi Komisije to ocijene za potrebnim.

Javni poziv po ovom Programu biti će raspisan nakon usvajanja Programa od strane Vlade Federacije Bosne i Hercegovine, i bit će otvoren 30 dana od dana zadnje objave.

Komisija će izvršiti pregled pristiglih zahtjeva za dodjelu sredstava s ciljem utvrđivanja formalne ispravnosti istih.

Komisija može zatražiti od preduzeća dodatna pojašnjenja i dodatnu dokumentaciju.

Komisija će na osnovu Programom utvrđenih kriterija i svojih internih akata (koja se donose po potrebi), sačiniti Prijedlog sa rang listom pojedinačnih zahtjeva, sa predloženim iznosima novčanih sredstava za dodjelu i dostaviti isti federalnom ministru energije, rudarstva i industrije na razmatranje.

Federalni ministar energije, rudarstva i industrije će, na osnovu dostavljenog Prijedloga rang liste pojedinačnih zahtjeva sa dodijeljenim iznosima novčanih sredstava od strane Komisije, uputiti Prijedlog odluke Vladi Federacije Bosne i Hercegovine o izboru korisnika grant sredstava.

11. KONTROLA UTROŠKA GRANT SREDSTAVA

Ministarstvo će imenovati Komisiju za kontrolu namjenskog utroška grant sredstava utvrđenih u razdjelu 17. Budžeta Federacije Bosne i Hercegovine za 2018. godinu Federalnom ministarstvu energije, rudarstva i industrije „Tekući transferi i drugi tekući rashodi – subvencije privatnim preduzećima i poduzetnicima“ (u daljem tekstu: Komisija za kontrolu utroška).

Komisija za kontrolu utroška radi u skladu sa Programom i Javnim pozivom, te svojim internim aktima i dužna je sačiniti Zapisnik o utrošku sredstava za svako preduzeće. Zapisnik se dostavlja Komisiji i federalnom ministru energije, rudarstva i industrije. Izvještaj o utrošku grant sredstava za 2018. godinu će se putem Ministarstva dostaviti Vladi Federacije Bosne i Hercegovine na razmatranje i usvajanje.

12. OBJAVLJIVANJE AKTA

Ministarstvo će ovaj Program, Odluku o usvajanju Programa i Odluku o izboru korisnika dijela sredstava utvrđenih u razdjelu 17. Budžeta Federacije Bosne i Hercegovine za 2018. godinu Federalnom ministarstvu energije, rudarstva i industrije „Tekući transferi i drugi tekući rashodi – subvencije privatnim preduzećima i poduzetnicima“ objaviti u „Službenim novinama Federacije BiH“ i na web stranici Ministarstva: www.fmeri.gov.ba

Ministarstvo će Javni poziv za kandidovanje Programa utroška dijela sredstava utvrđenih u razdjelu 17. Budžeta Federacije Bosne i Hercegovine za 2018. godinu Federalnom ministarstvu energije, rudarstva i industrije „Tekući transferi i drugi tekući rashodi – subvencije privatnim preduzećima i poduzetnicima“ objaviti u dnevnoj štampi „Večernji list“ i „Dnevni avaz“, te u „Službenim novinama Federacije BiH“, kao i na web stranici Ministarstva: www.fmeri.gov.ba

MINISTAR

Nermin Džindić